

卷一四三三 第字

卷一四二七 地字

卷一四二八 地字

永樂大典

永樂大典卷之一萬四千一百三十一

四齊

第

及第五

宋汪玉山集及第謝丞相啓。清問楊廷。獲預詳延之列。嚴宸時好而取充賦之先。揣叢賢之無庸。玷巍科而非據。凌兢失次。辭避莫遑。真。纂承之安危。繫於人才之進退。號稱多士之衆。必曰先王之時。上而三事大夫。下而百司庶府。凡厥在位。罔匪正人。有臺有萊。德音是茂。或薪或煇。髦士攸宜。若米芑於新田。若菁莪於中沚。籲俊以尊上帝。養賢以及萬民。所以用之而不窮。抑亦求之爲有道。始於教養。終以賓興。德進言揚。廣開數路。鄉舉里選。曲盡群情。數奏其言也。必明試而後庸。論辨其才也。必位定而後祿。朝廷有責實之政。君相有知人之明。如其不然。何以得此。至於後世。寢失遺風。選舉法存。祇以塞人情。而應故事。仕進沅冗。類皆追時好而取世資。上有取士之名。士無學古之志。雖曰無似。常以爲憂。洪惟真。纂承丕緒。體堯舜之孝弟。躬文武之勤勞。方當干戈多事之時。不替科舉三年之制。蓋欲講求於闕政。亦將搜攬於遺才。共圖復古之康功。仰繼得賢之

盛事。豈於今日。徒尚空文。宜有間出之異人。來副旁招之妙選。如某者。賦才短拙。稟性顛蒙。學僻而迂。齒少且賤。離䟽釋僑。粗求師友之淵源。研精覃思。莫見聖人之涯涘。姑守庸愚之份。敢萌僥倖之心。以童稚無聞之人。負賢能所難之任。仰孤君父之意。俯畏朋友之譏。退省其私。不知所處。此盖伏遇史館都督僕射相公。著龜當代。歸表萬邦。堂堂漢相之風。赫赫周民之望。有剛大不屈之氣。足以任天下之重。有誠明自得之學。足以格君心之非。收拾群才於士風彫喪之餘。發明吾道於邪說縱橫之際。載念車江之臨鎮。獲觀泮水之規模。漸漬薰蒸。親承德化。獎提誘掖。曲荷眷憐。遂致困窮。益勵懦夫之志。粗知趣向。願爲君子之歸。自惟不才。何以圖報。雖無治安之策。上贊廟堂中興之謀。敢以中庸明道之書。永爲座右修身之戒。及第謝信州太守。侍問楓宸。愧乏片言之善。登名桂籍。誤居多士之先。拜命若驚。循涯知幸。竊以四郊多壘。非國家閑暇之時。萬衆臨軒。有社稷安危之計。誠渴聞於至論。豈徒徇於空文。宜得間出之異材。來副中興之嘉會。誰云庸懦。首與甄收。如某者。學僻而迂。齒少且賤。離䟽釋僑。粗求師友之淵源。研思覃精。莫見聖賢之涯涘。姑守庸愚之份。敢萌僥倖之心。以童稚無聞之人。負賢能所難之任。仰孤君父之意。動畏友朋之譏。退

省其私不知所處。凌兢失次辭避。無從某官黼黻斯文。楷模後進。揭二天之日月。臨千里之江山。遂令蕞爾之資。亦玷褻然之舉。空慙晚學。莫伸拔薤之規。願與邦人共詠甘棠之愛。其為感佩未易名言。王十朋梅溪集及第謝宰相啓。地借玉階。恭上萬言之對。名登虎榜。濫居千佛之先。揣分踰涯。撫躬知愧。竊以奏言試功者。堯舜遺意。臨軒取仕者。祖宗令規。一新熙寧之科。備見神廟之志。謂三題不足發子大夫平日之蘊蓄。而群策可以陳我國家時政之闕遺。著為永彛。以幸多士。夫何首當時之選者。無切直之論。遂使擬進士之對者。有阿諛之議。既波蕩以相承。致源流之寢失。近代尤甚。澆風益滋。大臣多忌。而動有嫌疑。學者懷憤而莫伸。梗槩物極必變。道開始公。申嚴密之禁。而務在令行。防壅蔽之害。而悉開聖覽。求忠諫則丁寧有詔。第高下則寵廢有辭。既當清明不諱之朝。宜得瑰偉非凡之士。如某草茅賤子。庠序輒生。由行藝以進升。廁英髦而旅試。俯慚俗學。策無可取之二三。仰懼天威。事去欲陳之五六。念交淺言深。猶或不可。非主聖臣賢。其能有容。龍匪怒其嬰麟。龜偶居於前列。上自親擢。受知不減於孫洪。言略施行。悟意有踰於賈誼。靜惟僥冒。抑有寅緣。茲蓋伏遇僕射相公。以道事君。無私應物。蚤羽儀於法從。茂著忠嘉。今掌握於化鈞。亟圖

康濟。比露封章之請。益開宸聽之聰。獎勵進言。得裴宏中之大體。深銜議政。戒李吉甫之褊心。蓋將植太平之基。豈獨為諸生之賜。某敢不益堅儒業。恪守官箴。勉來事之可為。慕古人而有作。不負天子。惟彈精白之心。願為良臣。冀奉周旋之誨。過此以往。未知所裁。張叅政某官。厚德鎮浮。宏材拔萃。為一時之耆彥。聲百辟之表儀。明以保身。揖高風於赤松子。任而共政。繼前列於曲江公。欲振起斯文於委靡之餘。遂將順其美於聽納之際。陳樞密某官。稟純粹清明之姿。富博洽宏深之學。茂明大對。擢桂林之一枝。踐歷要途。搏鵬程之萬里。風膺宸眷。進握兵權。材兼文武。而夷夏聳觀。榮冠古今。而縉紳景慕。惟昔漸陽公之德化。竊嘗聞夫子之文章。方慚不肖其範模。何意克傳其衣鉢。楊侍郎某官。學極群書。文優四傑。纓纓議論。有眉山先生之流風。藉藉聲稱。繼開西夫子之遺懿。允矣儒林之冠。儀于從索之班。承師槐市。而既被作成。奏對楓宸。而復膺推獎。李侍郎某官。模楷士流。羽儀朝著。分符便郡。循良遠過於龔黃。持橐從班。儒雅同稱於班馬。比膺詔綽。親職文衡。革委靡而振士風。進忠諫以當上意。賀侍郎某官。為世儒宗。握時文柄。寘杜牧於高第。本崔郎之公心。號李白為謫仙。見李真之雅識。為盛代而開公道。贊吾君而求

直言。遂至繆庸。首膺選擢。劉侍郎才邵。某官。學校舊人。文章大手。仁為已任。典刑備著於老成。道與時行。德業兼全其久大。峻班行於筆橐。演誥命於絲綸。主張斯文。提撕後進。王侍郎傑。某官。朝著老成。士林碩望。蚤被知於宸扆。又更踐於禁途。出鎮侯藩。藹黃霸循良之譽。入司國計。得劉晏取予之宜。欲振起斯文於委靡之餘。故將順其美於聽納之際。陳侍郎康伯。某官。器粹珪璋。學深淵海。蚤著士林之望。亟膺宸眷之知。高玉山恬養之風。久淹琳食。復紫橐清華之舊。超冠天官。欲振起斯文於委靡之餘。故將順其美於聽納之際。張侍郎。某官。學海淵深。量陂宏大。蚤著士林之望。久膺宸眷之知。居務論思。豈獨得卑陶之理。發明仁怒。蓋能紹廷尉之平。欲振起斯文於委靡之餘。故將順其美於聽納之際。王舍人綸。某官。心醉六經。名先四傑。詞章典雅。有漢朝制誥之風。衡鑑精明。繼先公考校之盛。振起吾道。主張斯文。遂令舉首之榮。濫屬宗盟之末。趙舍人造。某官。挺秀坤維。結知天眷。策名龍首。茂騰四海之英聲。執筆螭頭。益厚一人之寵遇。振起吾道。主張斯文。遂令射策之謏聞。輒繼傳衣之盛事。周舍人麟之。某官。魏擢異科。荐要要職。黼黻河漢。詞章不減機雲。羽儀天朝。人物有如晉宋。振起吾道。主張斯文。遂令叢脞之才。輒玷褒然之舉。

孫少卿道人某官。挺秀岷峨。騰英庠序。挾黼黻之文於方冊。藹袴儒之詠於蕃宣。瑣闥來歸。快郎星之先親。曲臺進擢。仰卿月之清輝。比掌文衡。親承御札。哲鑑獨高於衆目。狂言特薦於匹夫。幸出自天。恩歸有地。周侍御方崇。某官剛毅不回。精忠自守。雍容禁近。邁鵠鷺而接夔龍。排繫姦邪。若鷹鷂之逐鳥雀。比膺詔綽。親職文衡。猥收狂率之言。上副聖明之旨。王殿院珪。某官受氣剛方。立朝挺正。位升橫榻。益揚蹇諤之風。望著中臺。克盡糾繩之職。力主張於公道。務振起於斯文。遂致妄庸。叨膺選擢。凌司諫曹。某官勁持不回。端方自守。直言中病。有王魏善諫之風。秦藁屢焚。無管晏暴君之失。力主張於吾道。務振起於斯文。遂致繆庸。誤膺選擢。王郎中剛中。某官問學淵深。氣節洪毅。楓宸射策。名切亞於龍頭。蘭省懷香。望獨高於鵷序。惟文柄之有屬。體上心之欲求。揭以平衡。志不回於馮宿。借之袞袞。言有取於劉蕡。遂令舉首之榮。濫被宗明之末。孟郡王。某官器粹與璫。慶傳珪組。襲亞聖大才之儒雅。光隆祐奕世之德勲。政邁龔黃。作股肱於藩郡。望高陰馬。資肺腑於懿親。方詔復蓬萊之遊。俄榮拜瀛洲之長。有光吾道。將振斯文。遂令蒐擢之流。首被甄收之列。陳熙堂。集代鄧彥通及第。謝陳達野運便啓。草茅賤士。瞻日月之餘光。稽顙腐

儒奉絲綸之明詔。此古人難以必遇。在今日乃得盡言。敢論末第之微。但慶平生之幸。竊以三代賢能之書廢。兩漢選舉之法疎。道不同條。人為異趣。華藻名家之學。激昂死黨之風。因循東晉之清虛。熟爛李唐之詞賦。功名富貴。尚多有之。用舍行藏。無足道者。賈太傅因讒夫而傷古。張廷尉貶高論以徇君。十事要功。甚矣姚崇之譎。三書自薦。惜哉韓愈之卑。賢者未免有疵。眾人夫復何望。若夫顏子之樂陋巷。孟氏之游諸侯。其處也藏器待時。其出也殉身以道。亦曰得君而後用。固非異俗以為高。方嘉會千載難逢。適大聖萬世一遇。宜展山林之素蘊。以膺廊廟之旁求。志雖止於為貧。進不妨於行義。此所以盟心鐵硯。裹飯棘園。雖鼓瑟不利於子玉。而焚舟必期於圖霸。如某者。數數歷落。真可笑。潦倒羸疎。已不堪。學詩每懼面牆。下筆固無腹藁。流落喪家之狗。浮沉水上之萍。久待詔於公車。屢隨書於禮部。周全反復者。四千里不啻。險阻艱難者。二十年有餘。呵故將於夜中。誰非醉尉。辱王孫於胯下。盡是少年。趁時自知不工。立意誠亦有待。乃者畏貽譏於畫虎。妄有意於連鰲。復緣鄉吏之薦名。遂預春官之別考。孤軍當隊。遠鴈失群。不圖寒族之微。泰在貴游之末。雖遺羹無路。空餘寸草之心。然捧檄承顏。不負一經之教。靜量泰竊。盖有寅緣。此盖伏遇某官。道

大兼容。仁深樂育。一麾南國。三載故鄉。衣錦飛榮。復擁八城之寄。登車思治。坐令萬物之春。曾是品題。致蒙收錄。念昔曳裾而稱客。于今歛板以趨庭。雖禮數之相違。諒故情之猶在。竹頭木屑。既叨暇日之收。馬勃牛溲。願備異時之用。過此以往。未知所裁。鄭剛中北山集謝及第啓。丹墀待問。謾懷千慮之愚。清禁臚傳。玷三人之列。省躬脩規。聞命震皇。竊以取士之科。得人為貴。然在上者或偏私而自用。則在下者多諂媚以求名。苟容汲黯之忠。豈乏劉蕡之策。國家運罹極否。數啓中興。於干戈僅息之時。講科舉必行之至。來此多士。坐之廣庭。聖詔謙恭。深見虛懷之意。衆心感激。誰非流涕之人。宜得英材。式符優選。如某者。東陽冷族。南巷貧家。虛公業於半生。耻姓名之三上。昔遊學校。妄求烏啄以充飢。回顧詩書。似種石田而無效。志雖堅而身向老。祿未及而親已無。瘦馬嘶風。飢鷹側翅。念晉州男子。尚包葦蓆以自言。彼新店民家。猶因畋獵而得諫。幸側奏名之籍。敢虞犯上之誅。既違斧斤。復叨紳笏。但猶滋味。頗嗟咀嚼之遲。從魏靴襪。多在箴聽之數。深惟忝冒。實有寅緣。此蓋僕躬相公。學貫古今。材兼將相。以周公伊尹之業為已任。以宣王光武之事望吾君。機務益繁。智力旁出。取虞淵之日。再俾光明。聖魏闕之心。不辭險阻。大慰蒼生之望。實為洪業之

基永鑒賣冰。無煩乞火。致茲庸瑣。亦預甄陶。某敢不益勵前修。勉圖後效。不能衝躍。過為私已之謀。惟有朴忠。無負恩門之賜。過此已往。未知所裁。葛立方歸。愚集謝及第啓。提無援之孤軍。謂當折北。奮卑飛之弱羽。敢冀圖南。忽驚較藝。以奏名。繼冒臨軒而賜第。逢辰特幸。揣分奚堪。竊以國莫重於人材。士要先於器識。虞夏商周之際。本德義以明揚。秦漢隋唐以來。用文詞而博舉。蓋深於涵養。則其歸必至於渾厚。而慎於踐履。則所到未易以測量。惟睿主之作成。斯賢才之觀化。國家偶中否之運。聖上挺勃興之資。當用武而尤急於搜賢。方在疚而不忘於試士。以賢良籲俊。而仍舉三年取士之制。以詩賦掄材。而兼求六經探道之人。既容門子之登塲。又集宗英而戰藝。欲伏俊髦之衆。共扶基本之強。宜得英能。以光拔舉。如某者。碌碌餘子。空空鄙夫。早被訓於鯉庭。旋樞衣於虎賁。大小百戰。首末十年。抱槩懷鉛。屈首短檠之燈火。汗顏血指。何心長缺之車魚。得齒官聯。本緣門調。侵尋歲月。奔走塵埃。念弟兄中第者四人。而父祖聯科者三世。失壽陵之步。恐負初心。學袁氏之吟。期承素業。再鼓餘勇。復理舊文。旅筆陣之千人。效鈐刀於一割。敢圖精鑒。不棄下材。矧避旁親之嫌。關付別頭之試。紛然多士。取者五人。非夙問於吹噓。豈遽容於叨冒。茲蓋伏遇某官。

中興基柱。後學著龜。斯文魯國之真儒。此道商民之先覺。每品題於人物。用培植於邦基。狂狷不違。是亦教誨而已。賤微兼取。而况親炙者乎。實有寅緣。致此僥倖。某敢不格專士檢。篤守官常。勉所不解。鞭其不及。龍門杳杳。粗逃黜額之羞。天漢迢迢。更假乘槎之便。王漢濱先生集謝及第啓。階任子之恩。已更賤役。應興賢之詔。復忝巍科。循鄙分以非宜。撫疎才而自愧。竊以國家惟百年之計。留意人才。學者以一日之長。致身科目。凡彼公卿之蹊徑。悉由文字以權輿。始類浮文。終收實用。遂使清朝篤意。謂糊名較藝之足憑。後進希聲。以射策決科為可貴。故此艱難之際。亦嚴搜選之方。神州尚隔於一隅。江表自稱為多士。雖未卜擒胡之月。亦不虛造勝之天。方三祀之亮陰。肅九重而恭默。龍池輟試。將權衡於近侍之臣。鴈塔書名。等甲乙於春官之考。訓辭甚切。聖意有加。精求賦日之才。博采濟時之略。謹其聲律。蓋將觀組織之工。訪以古今。所以考經綸之術。自非詞兼衆體。才擅數長。則何以副睿哲之旁求。處英賢之上列。如某者。衣冠寒族。庠序晚生。無遊觀廣覽之資。有孤陋寡聞之累。專心弱歲。攻書劒以徒勞。刻意前修。佩韋絃而自飭。妄起功名之意。早遊教化之原。博士一經。生徒數載。月程文藝。屢收得雋之功。秋賦賢能。亦在先鳴之列。自詭穿楊之藟。

不知拾芥之難。龍門未躍於西河。鯨鬣遂掀於東海。合繻以出。彈鋏而歸。繼纏風樹之悲。無復星槎之興。十年兵火。脫盜賊於中原。萬里風波。從衣冠而南渡。講道於絕糧之際。談經於弛擔之餘。素患難以安行。嘗險艱而已備。偶緣世賞。獲廁官聯。鐵違鑄硯之心。金負滿籩之訓。絕意冥鵬之寥廓。甘心斥鷃之翱翔。然素業傳家。懼弓冶箕裘之墮。青衫入仕。有塵埃挫楚之羞。痛自激昂。載加勉勵。家無文史。重興五厄之嗟。官有簿書。更苦三餘之窘。心耗於囊中之句。目昏於檠下之書。過時已覺於難成。中道幾思於自畫。向用朝廷之事。比許還首善之薦名。來求禮部之選掄。偶犯有司之程度。霜蹄遂蹶。劍氣空呈。復垂翅於回谿。獨倚輶於虞阪。功同猿臂。疑骨相之難封。命肖龍章。恨神仙之多障。有求弗獲。欲罷不能。屬詔綈之肆頒。厲辭鋒而再鼓。既與漕臺之計。復觀王國之光。朋來集四海之英。穎出盡一時之秀。時方用賦。皆升堂入室之流。士必通經。多專門名家之學。玉有荆山之韞。珠無滄海之遺。可謂盛哉。吁足畏也。方鐫錐之必較。忽糠粃以居前。然而求劍刻舟。守舊方而甚滯。好芋鼓琴。追時態以尤疎。文或病其雕蟲。技幾成於畫虎。既瑕瑜之不掩。宜葑菲之俱遺。何圖駢散之詞。猶玷公明之選。人非東晉。莫與劉琨之流。賦異阿房。終居杜牧之下。尚次甲

科之後。獲塵乙夜之觀。自揣奇窮。已為僥倖。此蓋伏遇某官。才高人傑。道契天民。以兼資文武之才。膺注意安危之寄。計存廟社。威名獨重於朝端。位冠臣鄰。風采想聞於天下。久持魁柄。力運化樞。折遐衝於敵人。窺伺之秋。鎮雅俗於國勢危疑之日。臨大事而不亂。蓋胷中之氣有餘。推至公而必行。故宇內之心自服。國有中興之漸。士無先職之憂。致此庸庸。有茲叨冒。某敢不益崇儒行。勉服官箴。隨所遇於他時。期粗伸於素志。被君相作人之澤。雖匪成才。師聖賢行己之方。則為報德。翟忠惠先生集代轉官賜第謝執政。比膺帝眷。並進官聯。仍拜賜於芝岳。遂登名於桂籍。龍光橫及。感涕交流。伏念某。性昧知方。才疎適變。少為遊學。不能收塲屋之功。晚乃遭時。已叨陳侍從之列。荷大均之曲造。懼小器之疾顛。每究勤渠。勉圖稱塞。技已窮而難強。力弗給而易疲。至如饋餉之薄勞。乃是轉輸之常職。俾之增秩。固慚恩數之已優。假以決科。更使品流之稍異。自惟何者。可得兼之。此蓋伏遇某官。道濟寰區。功存廟社。削除醜類。既恢經武之圖。旌別羣材。更助右文之化。故捐殊賞。以資微軀。某敢不竭節奉公。推誠奉上。謹邦國貢輸之備。識朝廷法令之宜。庶幾此心。何敢云報。陳長方唯室某謝及第啓。技藝南宮。濫居下列。拜恩北闕。遂覲清光。顧事業之空疎。被寵

榮而祗惕。伏念某得依丈席。爰自孤童。意廣而材卑。心空而質薄。磨礪撲
斲。每勤匠氏之功。長養護持。倍費場師之力。訖無堪稱。徒閱歲年。以至遍
走師門。獲交多士。指南所自。發軔云初。皆君子之使然。非小生之能爾。誰
知末路。寢失本心。以平生之所聞。望有司而求售。江湖巨浸。中道而乃變。
污潢培塿。學山卒歲。而僅同丘垤。尚祈誘掖。使有依歸。恭惟某官。盛德典
刑。斯文羽翼。忘名忘世。久從造物之游。呼馬呼牛。一聽時人之目。江山宴
坐。聲教郵傳。凡稱斯世之龍門。咸指當今之吳下。耆年如衛武。多齒若商
翁。行膺三老之求。無復五噫之歎。某敢不力行舊學。克謹官箴。無愧前修。
庶幾後日。既下酬於素志。亦上報於深知。史浩鄭孝真隱漫錄及第謝秦
太師啓。蘭省奏名。偶忝八士。楓宸唱第。復玷丙科。得過所期。榮不蓋愧。
竊以先王致治。宜莫急於賢能。後世取人。乃獨詳於科目。自庠序之商周之
教養。致師友無游夏之淵源。黨同伐異者。皆訓詁之腐儒。文麗用寡者。類
彫刻之童子。好惡已殊於鑒納。取舍每病於參商。亦既背馳。誰其兼善。屬
聖君有為之日。正賢輔相連之秋。崇雅黜浮。變斯民之耳目。息邪距諛。大
恢吾道之紀綱。探義理於聖人之言。賢人之言。辯典則於詩人之賦。詞人之
賦。近酌祖宗之遺制。遠追唐虞之頽風。合為一科。期於兩盡。詔音所至。士氣

頓申。鼓篋鼎來。揚鞭霧集。懷折角解順之辯。蘊凌雲歌雪之奇。當八面之
銳鋒。應兩端之善問。較以穿楊之藝。莫不爭先。要之折桂之榮。豈誠易得。
如某者識非造理。才不逮人。登罹陟岵之悲。長賴斷機之訓。顧蓂莢之未
緒。每冰炭於中懷。晝供菽水之庭闈。夜對簡編之燈火。棲身巖谷。絕意雲
霄。茲逢偃革之時。遂起彈冠之興。初偕漕計。再預鄉書。豈期下里之巴人。
偶造高陽之才子。賈誼升堂而相如入室。漸非能賦之流。高堂傳禮而徐
氏為容。浪得明經之譽。載惟幸會。必有寅緣。茲蓋伏遇某官。道格神祇。敷
隆古昔。以一命袞。為萬乘師。尹躬暨于成湯。天開一德。周公傳之孔子。時
集大成。禮制樂作。而措率土於一陶。仁漸義厚。而起斯文於五厄。力扶王
道。大正人心。俊良既樂於登崇。頑懦亦思於興起。致茲飢餓。亦被選掄。某
敢不增所未高。修其可願。趁風有便。慰執鞭欣慕之心。在治云初。污造物
甄陶之手。誓竭尋常之效。仰酬萬一之恩。及第謝秦內翰啓。較藝南
宮。偶參八士。獻言中禁。復玷丙科。揣分已踰。撫躬知愧。竊以古今共道。惟
得賢而立邦基。國家有禹。乃觀文而化天下。自堯舜廣招徠之路。至漢唐
發科目之程。識高伊管者。實洛下之諸生。才似班揚者。亦開元之進士。翔
翔丹地。比比有聞。照映青編。班班可攷。迨聖皇之撫運。得良弼以中興。肆

霖雨之命而追高宗歌清風之詩而繼宣后三歲定棘闈之制四門多槐
市之游博採布帛駕諸侯之輶傳中求閎闕與刺史之計偕賦就凌雲豈
唯司馬經明拾芥不數夏侯率歸典雅之流盡去浮華之習褒然出當是
舉翁爾咸高其才至於雄據上游蓋亦爵為名士顧茲殊選宜屬可人如
某者湖海窮徒乾坤長物鯉庭一問已經陟岵之悲軻室三遷尚賴斷機
之訓毀救每懷於養志荷鋤敢急於帶經雪積螢飛飽聽宵中之更漏花
開葉脫幾經林下之春秋屬逢偃革之時遂起彈冠之興秋天薦鶉漕臺
嘗預於後塵春浪化魯天路俄聞於首唱事既分於霄壤勢因隔於仙凡
懷卞和泣玉之誠敢辭再刖舉孟明焚舟之策當在此行果邁跡於荀龍
復分香於郗桂雖度長挈大未足為優而吹枯噓生豈無所自茲蓋伏遇
某官道優聖域文挾國華絳帳談經鄙向歆之立異彤墀射策極晁董之
未言遂結主知允諧人望北門視草煥王者之絲綸東觀提綱藹諸儒之
領袖居之甚寵進也未央行超青瑣之班即拜白麻之詔門凝瑞氣森然
畫戟之多位處台躔美矣緇衣之並收士尚勤於吐握成人每借於齒牙
致此屏庸亦蒙采錄某敢不益堅操履深懋進修附驥攀鱗猶念昔年之
場屋礪刀錯玉正祈此日之陶鎔誓竭駕才仰酬洪造陳止齋集及第謝

陳克齋先生啓。北面受經。久廁青衿之列。南宮擢第。偶收黃卷之功。起自布韋。齒之簪紱。凌兢知愧。俯偃歸恩。竊以學之邪正。繫乎所傳。道之廢興。視其所授。事無偏舉。理實相資。故傳之得其宗。則若升泰嶽而知衆山。儻授之非其人。則必下喬木而入幽谷。在人之取友。必端矣。而此亦擇善而從之。未易所以當明辯物正言。莫難探賸。而師所以傳道授業。解惑實藉舉隅。是以漢人之言。本之田何。焦生之說。託之孟氏。苟不有先覺之民。為之倡。則孰能使後進之士。知所從。伏念某。知識迂疎。氣質卑下。掘井而幾為廢井。學山而不至於高山。彫蟲篆刻。而旋覺其非。摘韋編而深違其旨。自志於學。已近為人。數十年結髮從師。雖未若施離之久。三萬言訓。故舉義。乃幸讀了公之書。故令微蹤。蓋竊寸祿。恭惟某官。受天間氣。為世儒宗。含英咀華。而作文章。研精覃思。以立訓傳。偶棲遲於枳棘。即騰蹕於雲霄。而樂善無厭。誨人不倦。大明君子之教。以育天下之才。彌綸天地之道。則先生相與言。溥博淵泉之功。則弟子不能學。自憐朽質。幾侍絡繹。雖循循然善誘人。與其進不與其退。然斷斷兮無他技。得其言未得其書。豈意決科。乃能中選。究言僥冒。皆出提撕。某敢不益勵丹心。仰酬素願。學優則仕。仕優則學。固無卒業之年。人而為鬼。鬼而為人。未盡服勤之義。姚成